

Après le decez et trespas dudit Loys, seigneur de Beaujeu, lequel fut de bonne et sainte vye, heureux en ses entreprises, luy succeda messire Guichard le Grand, son aîné filz ; lequel eust a femme et espouse en premieres nopces madame Jane, fille du conte de Geneve, de laquelle il eust une fille nommee Jane, et ung filz qui mourut jeune et innocent, bientost apres qu'il fut né, et fut ensepvely a Belleville avec sa mere, laquelle mourust de luy, lan de grace mil trois cens et trois, le vingtroisiesme jour de feburier. Tantost apres ledit Guichard fait faire le beau tumbeau qui est a Belleville, entre le grand autel et lautel saint Denys et saint Jaques. La premiere fille dudit Guichard, nommee Jane, fut maryee avec le seigneur de Partheney.

En secondes nopces, ledit seigneur Guichard de Beaujeu, baron dudit lieu, espousa tres noble dame, madame Marie, fille de puyssant seigneur messire (Gaucher), de Chastillon, connestable de France, de laquelle il eust une fille nommee Marie, qui fut despuys femme de monseigneur Charles de Montmorency.

Oultre plus, il eust de madite dame Marie de Chastillon ung fils nomme Oddouard, et une aultre fille nommee Helienor, qui fut religieuse à Polleteins. Et cy apres, par dispence de notre saint pere le pape, fut translatee à Sales. Et mourut ceste Marie, sa seconde femme, lan de notre Seigneur Jesus-Christ mil trois cens dix sept, le jour de vendredy saint ; elle fut enterree a Belleville, au nouveau sepulchre faict et construit par ledit Guichard, son seigneur et espoux.

En tierces nopces mondit seigneur Guichard le Grand eust a femme et espouse madame Jane de Chasteauvillain, fille de noble et puyssant seigneur messire Jehan de Lurey, heritier dudit Chasteauvillain, de laquelle il eust quatre enfans masles et une fille, cest asscavoir : Guichard, qui fut seigneur de Perreux ; Guillaume, lequel fut seigneur d'Amplepuys ;